

Iginio Macasso al vîf in Canada a Trail tal British Columbia, indulà che al è emigrât dopo de vuere

La Societât Filologjiche Furlane e à di pôc publicât il libri scrit di **Iginio Macasso**, originari di San Durî dal Tiliment che al vîf in Canada, ma nol à mai dismenteade la sô tiere. » DI FLAVIO VIDONI

Lis storiis di Leo, plenis di fede e morâl

Al è stât publicât di pôc de Societât Filologjiche Furlane il libri "La storie di Leo e altris storiis (di ca e di là da l'aghe e di chel altri mont)". Lu à scrit **Iginio Macasso**, classe 1922, originari di Sant Durî dal Tiliment, ma emigrât subite dopo la vuere, prime in France e po dopo in Canada. Il librut al conten une conte lungje in viertidure e daûr a son trentevot contis curtis e nûf poesiis.

A son dai ponts fers tal contâ di Macasso leâts a la sô vite e a la sô lungje esperience di emigrant. Prin di dut la sô

fede. Une fede tramandade in famee e acetade cence scrupui ni cencenaments e parimenti cun ligrie fate scori tes venis dai siei erêts come linfe vitâl. E leade a cheste fede ferme e je la morâl, ch'è travane dutis lis contis.

COME LIS FLABIS DI ESOPPO

Igino al fevele de sô infanzie, de sô zoventût, de sô dure vite di lavôr tal forest - dopo la tremende esperience di ritirade di Russie cui alpins - in mût sempliç e diret, cusì come che a fasevin lis vie-

lis dal so curtîl cuant che, di sere, a tiravin dongje la canaie prime di mandâle a durmî. E je vite vivude e tante fantasia ta lis sôs prosis, ma ancje la conte inventade e à simpri lidris ta la realtât cognossude in maniere direte, oben di seconde man. Cuant che i doi aspjets si mentin dongje al è par rivâ a une morâl come chê ch'è siere la plui grande part des flabis di Esopo.

Dit de fede e de morâl, un altri pont fer al è chel de nostalgia dal emigrant. Il Friûl al è simpri vîf in ogni so pinsîr, in ogni azion, tant plui tal

moment che si met a scrivi. Il so rapuart cu la Piçule Patrie al è di amôr dai vissars.

FRIÛL TAL CÛR

Igino al à tal cûr il Friûl ch'al à lassât a plui o mancul 25 agns di etât tal lontan 1947. Chel Friûl nol esist plui. Lui lu sa e i displâs, ancje sal fo propit chel Friûl a obleâlu a fâ la valis e a emigrâ. Al capis benissim che la storie no si pues fermâle. Nol vai i timps de "miserie nere", ma al è determinât a fâ in mût che ancje vuê, che lis robis a van un pôc miôr di chê volte, il ricuart di chê ete nol ledi pierdût. E e je justepont la puaretât patide ta la infanzie, paraltri cuntune vore di dignitât, un altri dai ponts fers dal so contâ. Ta la conte lungje "La storie di Leo" che e da il titul al libri e che lu vierç, si stricin diviers dai "ponts fers" dal contâ di Igino, ma al è un, in particolâr, a davuelzi la part di guide, il "fil rouge": la bontât da la int foreste, che pues fâ meracui, contraponude a lis tristèris da lis voltis impensabilis de bande di personis che, par sanc o afinitât, nus son plui dongje.



ilfriuli@ilfriuli.it


SCOLTADIS DI DRIUS

Miôr prime

Dotôr, o soi vignût a fai jodi i esams. "Prime bevin un tai". Parcè prime? "E se dopo o scugnairai diti che no tu pûs bevi?"



RADIO ONDE FURLANE
FM 90.0 WWW.ONDEFURLANE.EU



Scoltinus ancje in streaming o cu la APP (iOS e Android)!

Dute une altre lenghe, dute une altre musiche!

Tel. 0432 530614



@OndeFurlane



facebook.com/radioondefurlane